

S. Inqu. (15 Apr. 1885) clare indicat S. Sedem jam permettere ut sententia benignior in proxim deducatur. Quod responsum sic sonat : " Juxta exposita et attentis peculiaribus temporum circumstantiis, personas ecclesiasticas non esse inquietandas, si emerint aut emant actiones seu titulos mensae nummulariae, dummodo paratae sint stare mandatis S. Sedis et se abstineant a qualibet negotiatione dictarum actionum seu titulorum, et praesertim ab omni contractu qui speciem habeat ut vulgo dicitur *dei giuochi di borsa*. "

X. Non licet emere actiones vel obligationes eo animo ut carius vendantur. Hoc enim, saltem si habitualiter fit, veram negotiationem quaestuosam eamque maxime aleatoriam constituit. Ideo in Synodo Archid. Mechl. an. 1892 statutum est : " Quod attinet ad titulos census annui in aerario publico vel a societatibus fundatos, non licet sacris ministris in eis negotiari, i. e. *habitualiter* eos emere animo carius vendendi cum eorum pretium increverit. " Cfr. resp. S. Inqu. mox citalum.

§ 6. DE SAECULARIBUS DELECTIONIBUS VITANDIS.

42. I. Prohibentur clericis Jure Canonico (Deer. l. 3. t. 1. c. 15) *ludi alearum* et *taxillorum* : quo nomine veniunt ludi qui fere totaliter a fortuna pendent, non autem si qui, ut plures species ludi chartarum, potius arte reguntur. (S. Alph. l. 4. n. 900)

Rigorem veterum canonum plurimum temperavit praesens consuetudo. Quare " leges ecclesiasticas non infringere censemur qui parce, recreationis causa et secluso scandalo, aleis chartisque ludit. " (Aichner, Comp. J. Eccl. § 73) Graviter tamen peccaret clericus, in Sacris constitutus, qui simul et frequenter luderet et magnam pecuniae quantitatem exponeret. Insuper S. Alph. (l. c. n. 897) tenet graviter peccare illum qui frequenter et per longum tempus ludis prohibitis indulget : quod tamen, spectata hodierna consuetudine, nimis rigidum videtur, nisi grave scandalum detur laicis vel officia clericalia propter ludum notabiliter neglegantur. Tandem plures AA. (ap. S. Alph. l. c. n. 898) a gravi excusant clericum qui, secluso scandalo, magnam quantitatem ludo exponit, sed non frequenter ludit, quia canones (Deer. l. 5. t. 31. c. 11) loquuntur de clericis *lusibus dedito*. Hoc argumentum debile est, cum alii canones (Deer. l. 3. t. 1. c. 15) absolute prohibeant clericis lusus aleatorios. Sed postquam consuetudo plurimum emollivit hujus legis rigorem, hanc sententiam omnino probabilem ducimus.

II. A venatione abstinere jubentur clerici. (Deer. l. 5. t. 24. De clero venatore) Hanc prohibitionem communiter restringunt DD. ad eam venationem quam *clamorosam* vocant eo quod fiat cum magno hominum concursu, multorum canum apparatu, etc., quae restrictio prorsus congruit cum tenore canonum prohibentium ne canes, accipitres et falcones ad venandum nutrient clerici. Venationem autem *quietam* per se licere plerique autant. (S. Alph. l. 4. n. 606) Sic et Trid. (Sess. 24. c. 12. de ref.) dum jubet clericos abstinere ab *illicitis* venationibus et aucupiis, videtur innuere aliqua esse licita. Neque putaverim, ex lege universalis, requiri licentiam Ordinarii ut venatio quieta armis exerceatur, quemadmodum opinatur D'Annib. (III. n. 159). Cfr. n. 36.

Ipsa venatio clamorosa non est vetita sub gravi, nisi sit frequens et cum scandalo vel magnis expensis. (S. Alph. l. c.)

Saepe tamen episcopi utuntur jure suo prohibendi venationem etiam quietam. Ita Stat. Mechlin. (n. 56) eam tantum permittunt " quae laqueis aut retibus fiat, sine strepitu et offensione populi. "

43. III. Clerici prohibentur jure communi *tabernas ingredi*, edendi et bibendi causa, nisi iter agentes necessitate quadam adigantur. Ita Innoc. III (Deer. l. 3. t. 1. c. 15) : " Clerici tabernas prorsus evitent, nisi forte necessitatis causa, in itinere constituti. " Hanc eamdem prohibitionem urgent magisque determinant multa Statuta Synodalia vel Concilia Provincialia. Cfr. Stat. Mechlin. n. 52; Conc. Baltim. III. n. 80.

Tabernarum nomine veniunt loci omnes in quibus publice, quacumque diei hora, vinum, cerevisia, liquores etc., adventantibus minutim venduntur et sumuntur. Non veniunt ergo hoc nomine domus quae principaliter refectioni vel hospitio praebendo deserviunt. Quodsi domus quaedam, quae tabernis accensendae videantur, passim a clericis adeuntur, haec consuetudo servari poterit, dummodo ab Ordinario non reprobetur. Similiter consuetudinis est, juxta Ordinarii mentem, interpretari quantum iter sufficiat ad inducendam illam necessitatem quae a prohibitione excuset, vel determinare alias causas rationabiles adeundi tabernas. (Aichner, op. cit. § 72)

Severius in pluribus dioecesis, haec juris communis prohibitio urgetur, addita poena suspensionis ita ut ingressus plene illicitus, etiam semel factus, gravem culpam constituat. Censura haec viget in archidiaecesi Mechlin. (Stat. n. 52) et etiam in quibusdam dioecesis Stat. Foed. Amer. ut Crossensi et Kansanopolitana. Cfr. Nilles, Comment. in Conc. Balt. III. P. 2. p. 129 seqq. Quaedam notabimus de censura Mechlinensi, quae similibus decretis alibi latissimam affundere queant :

1º Requiritur ingressus *edendi, bibendi vel ludendi causa*. Hinc a censura immunis foret qui ingredieretur ad confabulandum, ephem-

rides legendas et similia, licet postea, occasione allactus, aliquid ederet vel biberet; probabiliter etiam **qui** cum intentione edendi, etc. ingressus, eam ad effectum non perduceret. (N. R. Th. t. V. p. 348 seqq.)

2º Censura non incurritur ab eo qui ingressus est sine plena deliberatione, vel dubitans num causa excusationis adesset: nam poenae huic gravissimae proportionata non est culpa theologicæ levis. Cfr. n. 568.

3º Poena haec afficit tantum clericos dioecesis Mechliniensis, vel in ea degentes seu in ea domicilium vel quasi-domicilium habentes, qui ingrediantur tabernam in territorio ejusdem dioecesis sitam. Cfr. Vol. I. n. 94 et Vol. II. n. 567.

4º Suspensio haec a divinis reservata est episcopo. Ut autem declaravit Em. Archiep. Mechliniensis litteris datis 7 Aug. 1897, ab ea absolvere nequeunt omnes sacerdotes quibus concessa fuit facultas absolvendi a reservatis, sed ii tantum quibus insuper concessa fuit facultas absolvendi a casibus pontificiis. Adverte, in quibusdam circumstantiis, quae enumerantur in folio facultatum pro confessionibus, omnibus confessariis concedi ut a casibus pontificiis absolvant.

44. IV. Prohibentur clerici quominus spectaculis turpibus assistant, quae in scaenis vel alibi exhibentur. Ita communiter interpretantur DD. (Reiffenst. in l. 3. Decr. t. 1. n. 142; Bened. XIV, de Syn. l. 11. c. 10. n. 11 seqq.) statutum Conc. Lat. IV: "Clerici... mimis, joculatoribus et histriobus non intendant." Quaenam spectacula in specie vitanda sint, presius determinari solet legibus dioecesanis. In Mechl. sub poena suspensionis i. f. incurriendae, sed nemini reservatae, prohibetur theatrorum publicorum ingressus, spectaculi videndi causa. Cfr. Conc. Balt. III. n. 79.

Multa alia in Jure Canonico clericis prohibentur: quae omittimus, eo quod minus practica sunt, et praestat remittere ad statuta particularia locorum, quibus eadem clarius proponi solent. (1)

§ 7. DE RECITANDIS HORIS CANONICIS.

45. Inter præcipuas clericorum obligationes recensenda est recitatio Horarum Canonicarum seu officii divini.

(1) De usu rotæ quæ vulgo audit *vélocipède*, nulla generalis prohibitio ab Ecclesia hucusque prodit. Illum plures episcopi in sua dioecesi prohibuerent clericis: inter quos Episc. Szathmariensis in Hungaria, cuius decretum laudavit S. C. Ep. et Reg. litt. ab Em. Praefecto d. d. 28 Sept. 1894, eo quod "prohibitio hujusmodi non solum liberat a corporis periculis sacerdotes ipsos, sed scandala avertit a fidelibus et irrationem ipsorum sacerdotum." (Act. S. S. t. 27. p. 437)

Non immorabimur exponendis variis partibus quibus Horae Canonicae constant, siquidem haec notitia facile ex ipso Breviario hauriri potest. Neque inhaerebimus variis formis quas, decursu saeculorum, sollemnis illa oratio induit; de quibus videsis: *Histoire du Bréviaire Romain*, par l'abbé Battifol. Satis erit nobis vigentem disciplinam exponere.

Punctum I. Qui ad Horas recitandas obligentur.

46. I. Ad Horas Canonicas tenentur sub gravi:

1º *Qui S. Ordinem suscepere.* Constat ex antiquissima Ecclesiae consuetudine, quam supponunt Cap. *Dolentes de Celebr. Miss.* datum ab Innoc. III in Conc. Lat. IV (1216) et Bulla S. Pii V, *Quod a nobis* (9 Julii 1568).

Incipit haec obligatio a momento ordinationis et proinde, secundum communem AA. interpretationem, ab ea parte officii diurni quae respondet horae diei qua ordinatio facta est. Ita qui ordinatur inter horam sextam et nonam, tenetur recitare Tertiam et sequentes Horas, siquidem Tertia nostræ horae nonæ respondet. Probabiliter satisfacit subdiaconus qui partem illam, ad quam tenebitur, mane recitat, antequam ordinatus est: quia anticipate solvi potest debitum quod morali certitudine contrahendum est. (S. Alph. l. 5. n. 140)

2º *Clerici beneficium ecclesiasticum possidentes.* Haec obligatio urgetur Const. *Supernaæ dispositionis* data a Leone X in Conc. Lat. V et Const. *Ex proximo*, S. Pii V. (20 Sept. 1571) Supponit autem verum beneficium ecclesiasticum pleno jure possideri, ita ut fructus inde percipientur vel certe percipiendi sint.

Eamdem legem multis explicant AA. antiquiores, ex. gr. S. Alph. (n. 114 seqq.): eam tamen hic praetermittimus, utpote a praxi alienam, cum in regionibus nostris nulli occurrant beneficiati qui non sint in Sacris constituti, ac propterea jam aliunde ad officium divinum obligati.

3º *Religiosi utriusque sexus ad chorum destinati et sollemniter professi.* De hac obligatione clare constat ex antiquissima consuetudine qua religiosi illi hanc Horarum recitationem persolverunt, etiam cum magno incommodo suo, tamquam officium quod sine gravi culpa omittere non potuissent. (Vol. I. n. 128) Quare jam hodie unanimes (ut videtur) AA. relinquunt sententiam paucorum veterum, gravem illam obligationem negantium. (S. Alph. n. 142)

Non tenentur tamen ad privatam recitationem ii qui vota tantum simplicia emiserint in Ordinibus votorum sollempnium, ut declaravit S. C. super Statu Regul. 6 Aug. 1858 (Coll. Bizz. p. 908), etiamsi hanc recitationem regula praescribit, ut in Ordine Minorum. (S. C. Ep. et